

Tnanin Sulat Febe Ale Pol di dad To Ftoo di ku Dyisas di Tésalonika

1 ¹Do, Pol, na Silas, na Timoti febe i sulat ani di gamu dad to ftoo di ku Dyisas déé di Tésalonika, dunan i dad to nfun Dwata Mà, na Dyisas Krayst i Amuto. Yé kayèmi moon ku i kafye Dwata na i ktnak nawan mnè di gamu.

I kdayen ale Pol di Dwata gablà di dad to di Tésalonika

²Sigi gami fasalamat di Dwata gablà di kdeeyu, na klomi to dmasal gamu. ³Di kat kdasalmi di Mào Dwata, là ti glifetmi i dad fye nimòyu du mdà di kaftooyu di Dwata, na i kalgadyu du mdà di kakdoyu, na i kbagal nawayu fatan ku Dyisas Krayst, i Amuto.

⁴E dad flanek, gadèmi bong nawa Dwata gamu, na nalékan gamu du fye nfunan gamu. ⁵Du i katdòmi i Fye Tulen, ise ku lo fagu di talùmi, bay lê fagu di gnagan i Mtiu Tulus, na là lwe nawami ftoo dun. Ta gadèyu i balumi di lammi mnè di safédyu, na nimòmi ani du gamfye di gamu.

⁶Ta ganbetyu gami na i Amu, du balù too gamu maflayam, bay baling gamu lehew dmawat i Tnalù Dwata du mdà di klehew blé i Mtiu Tulus gamu. ⁷Na yé duenam man, gamu nan gugambet i dad to ftoo di ku Dyisas ditù di Masidunya na Akaya, ⁸du ta mbel nan i Tnalù Dwata mdà di gamu banwe. Na ise ku lo di Masidunya na Akaya, bay ta linge i dad to di kdee banwe gablà di kaftooyu di Dwata, na taman ta balù là tulenmi dun di dale. ⁹Du ta baling dale tmulen gami gablà di kdawatyu gami di klauymi gamu. Na lêla tulen gami i ktagakyu dademe fnangamfùyu di munan du mdà di kfafasakyu di too glut Dwata mto. ¹⁰Na lêla tulen gami i ayèyu fatan i kasfulê Dyisas, i Ngàan mdà di langit, dunan i nték Dwata mdà di fati. Kenen falwà gito mdà di bong kaflayam fan kel.

I ta nimò Pol di Tésalonika

2 ¹Dad flanek, ta gadèyu sa nun bong mgimòmi di klauymi déé di gamu. ²Na ta gadèyu di lammi là fa gadéé di gamu, ta falnayam na

nadoy dad to gami ditù di Filipus, bay knèan tan-gal Dwata i nawami tamdò gamu i Fye Tulenan, balù ku dét i kafnang dad to gami.

³Na i kaflaumi gamu, ise ku kéng, na ise ku sasè i fandufmi, na là ti Inibungmi balù simto dun. ⁴Bay ku dét i fman Dwata gami, yé lomi man, du di kite Dwata, gsaligan gami tamdò i Fye Tulen. Ise ku yé flehewmi i dad to, bay yé flehewmi i Dwata, i gmadè kdee mnè di nawato. ⁵Ta tooyu gadè nan di katdòmi déé di gamu, là ti dagmi gamu, na là mimò gami kfagu mwè dad knunyu. Na Dwata i mite gami. ⁶Ise ku yé kayèmi ku gamu na i dademe dad to mdag gami. ⁷Du gami i dad to dek Krayst, taman nun ktoomi fatan mdà di gamu. Bay di knèmi di safédyu, yé balingmi nimò, toomi gamu kando salngad di yé mifat dad ngàan. ⁸Na mdà di kaktomi gamu, ise ku lo yé kayèmi blé di gamu i Fye Tulen mdà di Dwata, bay lê man i ktomi, du too gamu mabtas di gami.

⁹Dad flanak, sana kagafaldamyu i kalgadmi talbahò lammi mnè déé di gamu. Mdu na kifuh, too dee kafdalanmi mwè gulandèmi du fye là mlidù nawayu mifat gami di katdòmi i Fye Tulen mdà di Dwata. ¹⁰Gamu na i Dwata mite i nimòmi di gamu dad to ftoo lammi mnè di safédyu du mtiyu gami na tluh, na landè gumaslenmi. ¹¹Na gadèyu i kibòmi gamu salngad di nimò i mà di dad ngàan. ¹²Falnaumi na tdòmi gamu, na tan-galmi nawayu du fye di kaguyu, glalòyu knayè i Dwata, du faginan gamu di Kagotan na di kdatahan.

¹³Na ani lê satu duenmi fasalamat di Dwata, du kantomi tdò gamu i Tnalù Dwata, di kaklingeyu dun, ta dnawatyu. Na di kdawatyu dun, là salngadan di tulen i btal to, bay ta dnawatyu salngad ku Dwata i gumdàan, na yé sa dunan. Du i Dwata, ta nun nimòan di gamu dad to ftoo. ¹⁴Dad flanak, i mkel di gamu ani, salngad di ta mkel di dad to ftoo ditù di Dyudiya i nfun Krayst Dyisas. I dademe dad to di banweyu, falnayamla gamu salngad di kaflayam gdawat dad to ftoo di Dyudiya mdà di dademela Dyu, ¹⁵dunan i fmati ku Dyisas i Amuto, na i dad tugad Dwata, na lêla gami falnayam. Taman, là gaflehewla i Dwata, na knangla nawa kdee dad to, ¹⁶du fnangla gami tmulen di dad to ise Dyu i tnalù gamfalwà dale. Na fagu di nimòla ayé, too ale fnò sasè, taman mnè tahla i kalbut Dwata.

I ayè Pol samfulê di Tésalonika

¹⁷Na gami, dad flanak, di ta ksawagto, lo yé sawag i dad lawehto, bay sana kdéé di gamu i fandammi. Too mlifut nawami gamu, na gal gami mngabal kfagu salu déé di gamu du fye lê ato site. ¹⁸Kayèmi lê lmauy gamu déé. Do sa, Pol, bong dee dulègu meye kfagu gadéé di gamu, bay nsang Satanas i dalanmi. ¹⁹Landè dademe gumgal nawami, lo senan gamu, du gamu gumnè klehewmi, na gumdàmi mdag i kgaganmi di kanfe i Amuto Dyisas di kasfuléan. ²⁰Du gamu dagmi, na i gulehewmi.

I klauy Timoti di Tésalonika

3 ¹Kanto là gaganmi i klifut nawami gamu, yé fandammi, do na Silas, fanak gami di Atén, ²na dekmi Timoti gadéé di gamu, dunan i flanekto, na satu di dadememi gal tamdò i Fye Tulen gablà ku Krayst. Yé duenmi mdek kenen gadéé du fye tan-galan i nawayu, na tnbengan gamu di kaftooyu, ³du fye landè satu di gamu mgingok i kaftoon mdà di dad kaflayam mkel di gamu. Du ta gadèyu sa i dad kaflayam ani slame knayè Dwata di gito. ⁴Di lammi fanak di safédyu, ta falami tulen di gamu nun dad kaflayam fan kel di gito. Na i dad kaflayam ta manmi ayé, dunan i ta mkel ani. ⁵Kantogu là gagan i klifut nawagu gamu, taman ta dekgu Timoti gadéé di gamu du fye gadèmi gablà di kaftooyu. Yé klidùgu, keng gfisan Satanas gamu, na baling landè gukel i kdee nimòmi di blengyu.

⁶Bay ani, ta samfulê Timoti dini di gami, na too fye tulenan gablà di kaftooyu na di kasakdoyu. Na yé manan kloyu to famdam gami, na too gamu mayè samsite gami salngad di gami ayè samsite gamu. ⁷Na yé duenam man, dad flanek, balù di lam i kdee dad klimahmi na dad kaflayam ani, ta maglala i nawami du ta lingemi gablà di kaftooyu. ⁸Na ani, ta too fye nawami du gadèmi na too gamu kamgis di kaftooyu. ⁹Landè gusen i kfasalamatmi di Dwata gablà di gamu, na i klehew galyalomi mdà di gamu di kanfe i Dwata. ¹⁰Too mdà di nawami mni di Dwata mdu na kifuh fye ku lê ato site na snikofmi i kaftooyu ku nun gukulangan.

¹¹Yé kayèmi moon ku Dwata i Mào na Dyisas i Amuto mukà i dalanmi salu déé di gamu. ¹²Na yé lêmi knayè ku tananù Dwata i kasakdoyu di kat satu gamu dad ftoo, na di kdee to du fye salngad kasakdoyu di kaktomi gamu. ¹³Na fagu déé, tan-galan i nawayu, na mgimò gamu tluh na mtiu di kanfe i Dwata Mào ku ta samfulê i Amuto Dyisas magin i kdee nfunan.

I knayè Dwata fimò di dad to ftoo

4 ¹Na ani, dad flanek, nun fa kayèmi fni di gamu. Ta tdòmi gamu i fye kibò flehew i Dwata, na ta teenmi yé galyu nimò. Na ani fnimi na flaumi di gamu fagu di dagit Dyisas i Amuto, tooyu nidul fa i kimenyu ani. ²Ta gadèyu sa i flaumi gamu fagu di kdatah i Amuto Dyisas. ³Du ani knayè i Dwata, ftiu gamu, na niwasyu sasè knayè i laweh. ⁴Na gamu dad lagi, fye ku gadèyu i mtiu na mgafè kfagu mwè yaan. ⁵Na nang gamu mwè yaan ku mdà di sasè knayè i lawehyu gambet dad to là dmiè i Dwata. ⁶Taman, gablà di santulento ani, dnlèyu ktoo i satu to, na nang gamu lmumì. Na ta manmi di gamu di munan ku nè i to mimò salà salngad ani, falnayam Dwata. ⁷Ise ku yé duen Dwata malék gito ku fles

ato mnè di kagsik i salà, bay yé duenan malék gito du fye ftiu ato. ⁸Na yé duenam man, nè i to là mimen i tdò ani, ise ku to i là nimenan, bay Dwata, dunan i mlé gamu Mtiu Tulusan.

⁹Na gablà di kasakdoyu i dademeyu ftoo di Dwata, balù landè to faldam dun di gamu du ta tdò Dwata gamu ku dét i kibòyu sakdo. ¹⁰Taman, ta kandoyu i kdee dad flaneyku ftoo di kabal Masidunya. Bay, dad flane, yé fnimi di gamu tooyu nidul fa i kasakdoyu. ¹¹Too gamu fgal du fye nun ktanak di knèyu, na nangyu snamuk i dademe, na lo yé knudungyu i gamu nimò. Na too gamu falgad du fye gwèyu i dad gulandèyu salngad di ta manmi gamu di munan. ¹²Na ku ani nimòyu, i dad to là ftoo di Dwata, nafèla gamu, na ta là saligyu di dademeyu i gulandèyu.

I kasfulê Dyisas

¹³Na, dad flane, kayèmi ku gadèyu i kaglutu gablà di dad to ta mati du fye là mlidù gamu salngad di dad to landè fanden. ¹⁴Ta ftoo ato sa ta mati Dyisas, na ta lê mték. Taman lêto fantoo nték Dwata i dad to mati ta ftoo di ku Dyisas, na faginan ale di kasfulèan. ¹⁵Du yé gumdà tdòmi ani di Amuto. Gito dad mlawil fa di kasfulê i Amuto, là ti muna ato di dad to ta mati. ¹⁶Di du ayé, tamlo ulu i dad kasaligan, na salngan déé i uni fèw Dwata, na tufa i Amu mdà di langit. Yé muna nték Dwata i dad to ta mati di kaftoolu di ku Krayst. ¹⁷Na kafnge ayé, gito dad to mlawil fa dini di tah tanà, magket ato salu di dad labun du sagin di dad to ta nték du snitongto Dyisas i Amuto di tah. Na mnè ato di saféd i Amuto kel di landè sen. ¹⁸Taman, too gamu satgal fagu di tdò ani.

Fatlagad gamu di kasfulê i Amuto

5 ¹Na, dad flane, balù landè to smulat gamu ku kilen kagdohò i kdee ani, ²du ta gadèyu sa kakel i Du Kasfulê Amuto salngad di kel i to tmaku di kifuh. ³Too mlal kel i kalmola, salngad di libun maltien ku ta tamduk i tienan. Du di kman i dad to dun, “Too mtanak i kdee na landè samuk,” baling yé kakel i kalmola. Na là giwasla i kalmo ayé. ⁴Bay gamu, dad flane, ta là mnè gamu di gukmifuhan, na yé duenam man, là makto nawayu di du ayé gambet i dad to là gatlagad di kakel i to tmaku. ⁵Du i kdeeyu, ta mnè gamu di gumalwan na di neng, du ta nfun Dwata gamu, na ta là mnè ato di gukmifuhan. ⁶Taman, dad flane, too ato fgeye, na kloto to mnè di kagatlagad, na di ktanak fandam, là salngad di dademe. ⁷Yé gubong knudang i dad to di kifuh, na kifuh i lêla kaflangal. ⁸Bay du gito dad to mnè di gumalwan, taman là fakay ku là dnanto i ktoto. I kaftooto na i kasakdo, lsakto gambet anit. Na i kafdento i kagalwà, sukubto gambet kalù tek. ⁹Ise ku yé duen Dwata malék gito ku falnayaman, bay yé duenan du falwàan ato fagu ku Dyisas Krayst, i

Amuto. ¹⁰Yé duen Dyisas mati du kenen i tlasto du fye masasatu ato mnè di safédan balù ku ta mati demen ku là di kasfuléan. ¹¹Taman, satgal gamu nawa, na stabeng gamu, salngad di ta nimòyu.

I gusen flau Pol di dad to ftoo

¹²Na, dad flanek, ani fnimi di gamu, nafèyu i dad to falgad tmabeng gamu fagu di kebela na katdòla du mdà di Amuto. ¹³Tooyu ale nafè, na kandoyu ale du mdà di nimòla di blengyu, na sansatuyu i nawayu du fye nun ktanakyu. ¹⁴Na, dad flanek, ani lêmi fni di gamu, fanngeweyu i dad to malweh. Tan-galyu nawa i dad to mlidù, na ttabengyu i dad to mlungay. Na tooyu fantahà i nawayu di kdee. ¹⁵Na ilè ku nun to mimò sasè di gamu, nangyu bnalas. Bay yé nimòyu i fye di kat satu gamu, na di kdee dad to.

¹⁶Too gamu flehew. ¹⁷Too gamu dmasal di Dwata. ¹⁸Na balù ku dét i mkel di gamu, fasalamat gamu di Dwata fagu di ku Krayst Dyisas, du yé knayèan di gamu.

¹⁹Na nangyu nsang knayè i Mtiu Tulus. ²⁰Na nangyu sanlen i dad tdò faglabat Dwata di dad to. ²¹Na tooyu neye i kdee tdò ta lingeyu, ku glut, ku demen là. Na nè i glut, busekyu di nawayu, ²²bay fawag gamu di kdee sasè.

I dasal Pol

²³Mulà moon i Dwata, dunan i mlé ktanak nawa, ftiu gamu, na kamlung i ktoy—i layefyu, i nawayu, na i lawehyu—du fye landè gumaslenyu kel di kasfulè Dyisas Krayst, i Amuto. ²⁴Du gsalig i tamlo gamu, taman nimòan i kdee ani.

²⁵E, dad flanek, tooyu gami dnasal.

²⁶Fiteyu di kdee dademeyu ta ftoo i mtu kakdoyu dale.

²⁷Na ani lêgu fni di gamu fagu di kdatah i Amuto. Bnasayu i sulat ani di kdee dad flanekto ftoo.

²⁸Mulà moon i kafye Amuto Dyisas Krayst mnè di gamu.